

ጳውሎሲ ጸምቶሳስ ጳፊዳ ኮይሮ ኪታ ጊዶ ቆፋ

ጸምቶሳ ጌቴቲዛ ኢሲ ናቴላ ናይ ኢዛስካ ዬሌታ ዳሬይ ቄሪ ኢሲያ ጊዲሺን፥ ኢዛ ኣዬያ ኣይሁዳ ኣስ፤ ኣዋይ ቃሴ ገሪኬ ኣስ። ኢዚ ሚሺራቾ ቃላ ኦሶን ጳውሎሳራ ኢሲፌ ኦሉዛ ማታ ላጌ። (ሃዋ 16:1-3) ጳውሎሲ ጸምቶሳስ ኮይሮ ጳፊዳ ኪታዚ ሄ፹ ኣይፌ ዮኦታ ኦይኪዴስ።

ሄ ኪታዛን ኣይፌ ቆፋይ ሲንሳቲዲ ዋሳ ኬላ ጋርሳን ዴንዲዳ ዋርዶ ቲሚርቲፌ ኣሳይ ናጌታና ማላሳ። ሃ ዋርዶ ቲሚርቲዚ ባጋይ ኣይሁዳታፔ ባጋይ ቃሴ ኣይዛቤታ ቆፋ ኦይኪዳዝ ጊዲሺን፥ «ሃይሲ ኣይፌን ቤቲዛ ኣላሜዚ ናጋራን ሞሬቲዳ ጊሻስ ኣሳስ ፓጾቴሉ ቤታናይ ሃራ ዲማ ዲማ ጹራ ኤራቴላኒኔ ኢሲ ኢሲ ቁማታ ሞንታ ኣጎን፥ ኤኮንታኔ ጌሎንታ ኣጎንኮ» ጊዛ ቆፋ። ሃሳፊካ ቦላራ ኢዛ ኪታዚ ዋሳ ኬላ ኣይሶ ጊሻሲኔ ጸስ ጎይኖ ጊሻስ ታማርሲዛ ዋጋይ ሃሳፊካ ዋሳ ኬላ ጨማቲኔ ኢስታ ማዲዛይታስ ዴኣናስ ቤሲዛይ ኣዛኮ ዮቴስ። ወርሴላን ጸምቶሲ ዬሱስ ኪርስቶሳስ ሎኦ ኦሳንቻ ዋኒ ጊዳናስ ቤሲዛኮ ኢዛስ ዲማ ዲማ ኣማኒዛይታ ቦላ ዲዛ ኣላፊቴላ ጊሻስ ጳውሎሲ ኢዛስ ኢሚዳ ዞሬ ቤዮስ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1-2

ዋሳ ኬላ ጊሻሲኔ ዋሳ ኬላ ጋርሳን ኦሉዛይታ ጊሻስ 1:3

—3:16

ጸምቶሳስ ኢዛ ኦሶ ጊሻስ ኢሜቲዳ ቲሚርቲ 4:1—6:21

¹ ኦና ኣሺዳ ጸሳን፥ ኦስ ሂዶታ ጊዲዳ ዬሱስ ኪርስቶሳ ኣዛዘን ሃዋሬ ጊዲዳ ጳውሎሳፔ

² ኣማኖን ታስ ቱሙ ና ጊዲዳ ጸምቶሳስ ጸሳ ኦ ኣዋፔ ኦ ጎዳ ዬሱስ ኪርስቶሳፔ ኪያቴሉ፥ ማርቴሉኔ ሳርይ ኔስ ጊዶ።

ዋርዶ ኣስታማሬታፔ ናጌታና ማላ ኢሜቲዳ ኣዛዘ

3 ታኒ ማቂዶኒያ ባሼ ኔና ሃዳራ ጊዳ ማላ ሃይሳፌ ሲንፋን ኢሲ ኢሲ አሳቲ ዋርዶ ቲሚርቲ ታማርሶንታ ማላ ኔ አዛዛናስ ኤፌሶንን ዳሻ።

4 ቃሴካ አሳይ ዮቲን ወርንታ ቤኒ ዋዴ ሃይሲኤን ባ ዋዴ ወርሶንታ ማላ አዛዛ፤ ሄይታ ማላ ዮኦይ ፓላማ ዴንፌፌስ አቲን አማኖን ኦሴቲዛ ጸሳ ኦሶስ አይኮካ ጎኤና።

5 ሃ አዛዛዛስ ዋና አይፌ ዮኦይ ጊዲኮ ጌሻ ዋዚናፔ ሎኦ ቆፋራ ሄሳሶካ ቱሙ አማኖፔ ቤቲዛ ሲቆ።

6 ኢሲ ኢሲ አሳይ ሃይታፔ ፖቂ ኤቂዲ ጎኦይ ባይንዳ ዮኦታኮ ሲሚዴስ።

7 ዋጋ ታማርሲዛይታ ጊዳና ማላ ኮዬቴስ፤ ጊዲኮካ ኢሰቲ ባ ዮቲዛይሳ ዋይኮ ኬሂ ሞቴቲዛ ዮኦዛ ሎኤሊ ኤሬቴና።

8 ጊዶ አቲን አሲ ማራን ጎኤቲዛኮ ዋጋይ ሎኦ ጊዲዳይሳ ኦ ኤርስ።

9 ቃሴካ ዋጋይ አሜቲዳይ ጸሎ አሳስ ጊዶንታ ዋጋ ዬዲ አዲዛይታስ፤ አዛዜቶንታይታስ፤ ጸሳስ ባቦንታይታስ፤ ናጋራንቻታስ፤ ጌሻቲሊ ባይንዳይታስ፤ ጸሰ ሎቂዛይታስ፤ ባ አዮኔ ባ አዋ ዋዲዛይታሲኔ ሽሞፖ ዋዲዛይታስ ጊዲዳይሳ ኦ ኤርስ።

10 ሄሳሶካ ላይማቲዛይታስ፤ አዴራ አቂዛ አዴታስ፤ አስ ባይዚዛይታሲኔ ሻሚዛይታስ፤ ዋርዳንቻታስ፤ አሳስ ዋርዶራ ጫቂዛይታስ፤ ሎኦ ቲሚርቲራ ኤቂቲዛ ኡባታሳ።

11 ሄ ሎኦ ቲሚርቲይ አንጄቲዳ ጸሲ ታስ ሃዳራ አሚዳ ቦንቾ ሚሺራቾ ቃላራ ጋጊዛይሳ።

ጳውሎሳስ አሜቲዳ ጸሳ አሞታ

12 ታና ባ ኦሶስ ሹሚዲኔ አማኔቲዛዴ ሂስቲ ኤኪዲኔ ታስ ሚኖቴላ አሚዳ ኦ ጎዳ ዬሱስ ኪርስቶሳ ታ ጋላታይስ።

13 ሃይሳፌ ካሴ ታ አይ ማላ አስ ጫዩዛዴኔ ጎዴሊዛዴ፤ ቃሴ ማካላ አስ ጊዲኮካ ሄሳ ታ ኤርንታኔ አማኖንታ ዳሼ ኦሊዳ ጊሻስ ጸሲ ታና ማሪዴስ።

14 ዬሱስ ኪርስቶሳፔ ጊዲዳ አማኖራኔ ሲቆራ ኦ ጎዳ ኪያቴሊ ታስ ኬሂ ዳሪዴስ።

15 ዬሱስ ኪርስቶሲ ናጋራንቻታ አሻናስ ዱጌ ሃይሳ ሃ አላሜ ዩዴስ ጊዛ ቃላይ ቱማኔ አሲ ወሪካ ኤካናስ ቤሲዛይሳ። ናጋራንቻታፔካ አዲዛ ናጋራንቻይ ታና።

16 ጊደ እቲን ታ ማሬቲዳይካ ዬሱስ ኪርሰቶሲ ዛዋይ ባይንዳ ባ ዳንዳያ፡ ኡባፌ አዲና ናጋራንቻ ጊዲዳ ታ ቦላ ቤሲዳይ ኢዛን አማናይታሲኔ ሜርና ዴኦ ዴማናይታስ ለሚሶ ጊዳና ማላሳ።

17 ሄሳ ጊሻስ ሜርናስ ሃይቁ ኤርንታ፡ አይፌን ቤቲ ኤርንታ ባርካ ጸላ ጸስ ጊዲዳ ካዎስ ሜርናፔ ሜርና ጋካናስ ኢዛስ ቦንቾይኔ ጋላታይ ጊዶ። አሚን።

18 ታ ና ጸምቶሳ! ኔ ጊሻስ ካሴቲዲ ዮቴቲዳ ማላ ሃይሳ አዛዘዛ ታ ኔስ አማዲስ፤ ሄሲካ ኔ ሄ ቃላ ካላሼ ሎኦ ባጼ ባጼታናሳ።

19 አማኖይኔ ሎኦ ቆፋይ ኔስ ዴኦ፤ ኢሲ ኢሲ አሳቲ ባ ሎኦ ቆፋ ዬዲ አዲዲ አባ ቦላ ሜቶይ ኢዛ ቦላ ጋኪን ዋዬቲዛ ማርካቤ ማላ ባ አማኖ ዳይሲዳ።

20 ኢስታ ጊዶን ጸሳ ጫሽ አጊዲ ታማራና ማላ ታኒ ጸላኤስ አላ አሚዳይቲ ሄሜኔዎሲኔ ኢስኪንዲርሲ ዴቴስ።

2

ጸሳስ ጎይኖ ጊሻስ አሜቲዳ ዋጋ

1 ሄሳ ጊሻስ ኡባፌ ኮይሮ ሃራ አሳስ ሾቤላ ዋሳ፡ ጋናቴላ ዋሳኔ ጋላታ ዋሳ አሳ ኡባስ ካዎታሲኔ ዴሬ አይሲዛይታስ ኡባስ ዋሳና ማላ ታ ኔና ቆፍሳይስ።

2 ሄሲካ ቱሙ አያና ዴሳኒኔ ጌሻቴላ ኡባን ኑኒ ሳሮቴላኒኔ ዋጋን ዳና ማላሳ።

3 ሃይሲ ኑና አሺዛ ጸሳ አቻን ሎኦኔ ኡፋይሲዛዛ።

4 ኢዚ አሲ ዉሪ አታና ማላኔ ቱማ ኤራና ማላ ኮዬስ።

5 ኢሲ ጸሲ ጸላ ዴስ፤ ቃሴካ ጸሳሲኔ አሳስ ጊዶን ኢሲ ጊግሲዛ ጋናይ ዴስ፤ ኢዚካ አስ ጊዲዳ ዬሱስ ኪርሰቶሳ።

6 ኢዚ ባና አሳ ኡባስ አላ አሚዴስ፤ ሄሲካ ሄራካ ዋዴይ አዶንታ ኢዛስ ማርካቲዴስ።

7 ታኒካ ሃይሳስ ሚሺራቾ ቃላ ዮታናስ ከቴቲዳዴ፤ ቃሴካ ዴሬታስ ቱሙ አማኖ አስታማሬ ጊዳዳ ሹሜታዲስ፤ ሄሳካ ታ ዋርዶቶንታ ቱሙ ዮታናሳ።

8 ሄሳ ጊሻስ እቱማ አሳይ ኡባሶን ሃንቆይ ባይንዳኔ ፓላማይ ባይንዳ ባ ጌሻ ኩሼታ ፑዴ ቶቁ ሂስቲዲ ዋሳና ማላ ታ ኮያይስ።

9 ሄሳቱን ማጫሳቱ ሆነችራ ባና ሺሺ ኤኪዲ ቤሲዛ ማይኦ ማይኦቶ ኣቲን ባ ሁኤ ዳዲ ኤኪዲ ወይኮ ኣልኦ ማይኦ፡ ዋርቃኔ ኢንቁ ኣሲዲ ዋልቂ ዋልቂ ጎፔቶ።

10 ጊዶ ኣቲን ጸሰ ዋሶስ ጊዛ ማጫሳቱ ኢሰታሰ ኦፋና ቤሲዛ ሎኦ ኦሶን ሎኤቶ።

11 ማጫሲ ጮኡ ጋዳ ኩሚላራ ኣዛዜቱል ታማሩ።

12 ማጫሲ ጮኡ ጋናፔ ኣቲን ኢዛ ታማርሳና ማላ ወይኮ ኣዴ ቦላ ጎዳታና ማላ ታ ኮይኬ።

13 ጋሶይካ ኮይሮ ኣዳሚይ ሜጴቲዴስ፤ ካላዳ ሄዋና ሜጴታዲስ።

14 ቃሴካ ኮይሮ ባሌቲዳይ ኣዳሚ ጊዴና፤ ባሌታዳ ጸሳ ዋጋፔ ኣጲዳይ ማጫሳዮ።

15 ጊዲኮካ ማጫሲ ኣማኖኒኔ ሲቆን ጌሻቴላን ባርካ ባና ሃርን ሚኒኮ ና ዬሎን ኣታና።

3

ዋሳ ኬል ካሌልዛይታ

1 «ኦኒካ ዋሳ ኬል ጨማ ጊዳና ኮይኮ ሎኦ ኦሶ ኣሞቴስ» ጊዛ ቃላይ ቱማ።

2 ሄሳ ጊዲኮ ዋሳ ኬል ካሌልዛይታ ቦሬይ ባይንዳዴ፡ ኢሲ ማቻ ዲዛ ኣዴ፡ ጊናራ ዲዛዴ፡ ባና ሃሪዛዴ፡ ዋጋራ ኣቁዛዴ፡ ኢማል ሞኪዛዴ፡ ታማርሳናስ ዳንዳይዛዴ፡

3 ማሶቶንታዴ፡ ኦሽ ኦዬቶንታዴ፡ ቃሴ ማራጌ ኣስ፡ ኣሳራ ፓላሚቶንታዴ፡ ሚሽ ጎዶንታዴ ጊዳናስ ቤሴስ።

4 ባ ናይታ ኣዛዜቲዛይታኔ ኣስ ቦንቹዛይታ ሂሰቲ ዲቹዲ ባ ኬል ኣሳ ዋጋራ ኣይሲዛዴ ጊዳናስ ቤሴስ።

5 ኢሳዴይ ባ ኬል ኣሳ ዋጋራ ኣይሶ ኤርንታ ኣጊኮ ጸሳ ዋሳ ኬል ዋስቲ ናጋና ዳንዳይዛዴ?

6 ኦቶሬቴላን ፑሪዲ ጸላኤይ ኩንዲዳ ፒርዳን ኢዚ ኩንዶንታ ማላ ኦራል ኣማኒዛዴ ጊዶፖ።

7 ቃሴካ ኢዛ ሱንላን ቦሬቶንታ ማላኔ ጸላኤ ናርጸን ኢዚ ጌሎንታ ማላ ኣማኖንታ ኣሳ ኣቻን ሎኦ ማርካቴል ዳናስ ኮሼስ።

8 ዳቆኔቲካ ሄሳሶ ቦንቹቲዳይታኔ ባ ጊዳ ቃላ ላሚ ላሚ ዬጎንታይታ፡ ዳሮ ወይኔ ኡሻስ ኣሞቶንታይታ፡ ኦጌይ ባይንዳ ጎኣ ጎዶንታይታ ጊዳናስ ቤሴስ።

9 አማኖ ጹራ፥ ሎኦ ቆፋራ ናጋናስ ቤሴስ።

10 ሃይታንቲካ ኮይሮቲ ፓጮቴቶ፤ ኢሲ ኢታይ ኢስታ ቦላ ቤቶንታ ኣጊኮ ሄሳፌ ጉዬ ዳቆነቴላን ኦፊቶ።

11 ማጫ ዳቆነቲካ ቦንቹቲዳይታ፥ ዘጊርንታይታ፥ ቃሴ ዋጋራ ዲዛይታ፥ ሃኖ ኡባን አማነቲዳይታ ጊዳናስ ቤሴስ።

12 ዳቆነቲ ኢሲ ማቹ አዚና ጊዳናስ ቤሴስ፤ ቃሴካ ባ ናይታኔ ባ ኬላ አሳ ዋጋራ አይሲዛይታ ጊዳናስ ቤሴስ።

13 ዋጋራ ኦሊዳይቲ ባስ ጊታ ቦንቹኔ ዬሱስ ኪርስቶሳን ኢስታስ ዲዛ አማኖን ዳሮ ጸላቴል ዳማና።

14 ታ ኔኮ ኤሌ ባና ኮይኮካ ሃይታ አዛዞታ ኔስ ጸፋይስ።

15 ታ ሃኖ ኔስ ጸፊዛይ ታ ጋምኢዛ ጊዲኮካ አሳይ ጸሳ ኬላን ዋኒ ዳናኮ ኔ ኤራና ማላ ጋዲኮ! ኬላይ ዴኦ ጸሳ ዋሳ ኬላ፤ ሄሲካ ቱሙ ቱሲኔ ጸጸ።

16 ቱሙ አያና ዱሳ ጹራይ ሲጼይ ባይንዳ ጊታ፤ ኢዚካ፥ «አሴ ጊዲዴስ፤

ኢዛ ጸሎቴል

ጸሎ አያናን ቆንጪዴስ፤

ኪታንቻታስ ቤቲዴስ፤

ዴሬ ኡባስ ሳባኬቲዴስ፤

አላሜን ዲዛይታን አማነቲዴስ፤

ቦንቹራ ፑዴ ዴንዲ ቢዴስ» ጊዛይሳ።

4

ዋርዶ ታማርሲዛይታ

1 ዋዴ ዉርሴላ ቦላ ኢሲ ኢሲ አሳይ አማኖ አጊዲ ባሌሊዛ አያናታኔ ኢታ አያና ቲሚርቲ ካላናይሳ ጸሎ አያናይ ቆንጪራ ዮቴስ።

2 ሄሳ ማላ ቲሚርቲይ ኢስታ ቆፋይ ቦንቆ ቢራታን ጸጌቲዳ ማላ ጌላቴላን ዶጪዳ ቆጼፔ ቆሞን ሃኒዛ ዋርዳንቻ አሳታፔ ያና።

3 ሄ አሳቲ አሳይ ኤኮንታ ማላኔ ጌሎንታ ማላ ዲጋና፤ አማኒዛይቲኔ ቱሞ ሻኪ ኤሪዛ አሳይ ጸሲ ሜጲዳ ካል ጋላታራካ ኤኪዛይቲ ሞንታ ማላ ዲጋናኔ አዛዛና።

4 ጸሲ ሜጲዳይ ወሪካ ሎኦ፤ አሲ ጋላታራ ኤኪኮ ዋራ ዋጲዛይ ኢሲናካ ዴና።

5 ዉሪካ ጸሳ ቃላኒኔ ዋሳን ጌያና።

ኪርስቶሳስ ሎኦ ኦሊዛ ኦሳንቻ

6 ሃይሳ ሃ አዛዞዛ አማኒዛ አሳ ኔ ቆፍሲኮ፥ አማኖ ቃላኒኔ ኔ ኤኪዳ ሎኦ ተሚርቴዛን ሚናዳ ዩሱስ ኪርሰቶሳስ ሎኦ ኦሳንቻ ጊዳንዳሳ።

7 ጸሰ ቦንቹሶንታ ጎአይ ባይንዳ ሃይሲኤፔኔ ጨማ ማጫሳታ ሃይሲኤፔ ሃካዳ ቱማ አያና ኦሶስ ኔ አሳቴላ ጊሊሳ።

8 አሳቴላ አሾ ኦጌን ደሲሶይ ጉላ ዋዴሰ ጎኤሰ ሺን ቱሙ አያና ዱሳስ ባና ታማርሶይ ጊዲኮ ሃይሳ ሃ አላሜዛሲኔ ቡሮ ያና ዱሳስ ሂዶታይ ዲዛ ጊሻሰ ኡባሰ ጎኤሰ።

9 ሃይሲ ሃ ቃላይ አማኔተዳይሳኔ ኡባይ ኤካናሰ ቤሲዛ ቃላ።

10 ኑ ሄሳስ ጊዲ ዳፌቶሲኔ * ዳቡሮስ፤ ሄሲካ አሳ ኡባሰ ሃራፔካ አማኒዛይታስ አሺዛ ዴኦ ጸሳን ኑ ሂዶታ ኦሊዛ ጊሻሳ።

11 ሃይታ ዮኦታ አዛዛኔ ታማርሳ።

12 ኔ ዩላጋቴላ ኦኒካ ሌቆፎ፤ ጊዶ አቲን ኔኒ ሃሳያን፥ ዱሳን፥ ሲቆን፥ አማኖኒኔ ጌሻቴላን አማኒዛይታስ ሎኦ ሌሚሶ ጊዳ።

13 ታ ሄ ባና ጋካናሰ ቃላ ናባባናሰ፥ ዞራናሲኔ ታማርሳናሰ ሚና።

14 ጨማቲ ኔ ቦላ ባ ኩሼ ዋሊ ዋሲሺን፥ ኔሰ አሜቲዳ ቲንቢቴ አሞቴላ ሌፒ ሂሰታ አጎፋ።

15 አሲ ዉሪ ኔ ዲቻ ቤያና ማላ ሃ ዮኦታ ሎኤላ ሚንላዳ ዳንዳያን ፖላ።

16 ኔ ዱሳ ጊሻሲኔ ኔ ታማርሲዛ ተሚርቴዛስ ናጌታ፤ ሃይታን ሚና፤ ኔ ሄሳ ኦሊኮ ኔናኔ ኔ ጊዛይሳ ሲዩዛይታ አሻና።

5

አምኤታ፥ ጨማታኔ አይሌታ ጊሻሰ አሜቲዳ ዞሪ

1 ጨማ አሳ ኔ አዋ ማላ ቦንቹራ ዞራ አቲን ዶምኦፋ፤ ናቴላ አቱማ ናይታ ኔ አሻታ ማላ ጸላ።

2 ሄሳሶካ ጨማ ማጫሳታ ኔ አዪ ማላ፥ ናቴላ ማጫሳታ ቃሴ ኔ ሚቹታ ማላ ሱራ ዋዚናፔ ጸላ።

3 አዳፌ ሜቶቴቲዳ አምኤታ ሎኤላ ናጋ።

4 ኢሲ አምኤይሰ ናይ ዋይኮ ና ናይ ዲዛ ጊዲኮ ሄ ናይቲ ባሶ አሳታ ማዳናሲኔ ባና ዩሊዳይታስ ካሴ ኢሰቲ ኦሊዳይሳ ኩሼ ዛርን ሃራፔ ካሴቲዲ ባ አማኖ ኦሶን ቤሳናሲኔ ታማራናሰ ቤሴሰ፤ ሄሲካ ጸሰ ኡፋይሲዛይሳ።

* 4:10 ዳፌቶስ፡ ዳፌቶስ ጊዛይሳ ኢሲ ኢሲ ቢርሼላ ማጻፋቲ፥ «ባጼቶስ» ጊሺን ኢሲ ኢሲኔቲ፥ «ጫዬቶስ» ጊዲ ቢርሼዳ።

5 ቃሴ ቱማፔ ማደይ ባይንዳ ባርካ ዲዛ እምኤያ ጸሰ ጸላ ጸላዉስ፤ ዋሳሲኔ ጸሳፌ ማደ ዴማናሰ ጋላሲኔ ቃማ ሚኔታዉስ።

6 ሃ ቢታ ሎኦ ዱስ ጸላ ኮይዛ እምኤያ ጊዲኮ ኢዛ ፓጸ ዳሼ ሃይቂዳሮ።

7 ኦና ቦላካ ዋሶይ ዶንታ ማላ ሃይሳ እዛዘዛ እሳስ አላ።

8 ኢሲ እሲ ባ ዳቦታ ሃራፔካ ባሶ እሳ ማዶንታይሳ ጊዲኮ ኢዚ እማኖ ካዲዳዴኔ እማኖንታ አሳፔካ አፂ ኢታ አሳ።

9 ኢዚሰ ላይሳይ ኡሱፑን ታሙ ላይሳፌ ጋርሳን ዲዛ እምኤይ ሱንሐ እምኤታ ማዘጋባን ጸፎፓ፤ ቃሴካ ኢዛ ካሴ ኢሳዴ ጸላ ጌሊዳሮ ጊዳናሰ ቤሴስ።

10 ናይታ ዲቾኒኔ ኢማላ ሞኮን፥ እማኒዛይታ ቶሆ ሜቻን፥ ሜቶቲዳይታ ማዶኒኔ ሎኦ ኦሶ ኡባን ባና አላ ኢማላ ሎኦ ኦሶንካ ኬሃ ኤሬቲዳሮ ጊዳናሰ ቤሴስ።

11 ናቴላ እምኤታ ጊዲኮ ሄሳ ማላ ማዘጋባን ጸፎፓ፤ ጋሶይካ ኢሰታሰ ዲዛ እዚናራ ዳና እምይ ኢሰቲ ኪርሰቶሳስ ኦላና ጊ ጌሊዳ ቃላፔ ቦላራ አፂዛ ዋዴ አዴ ጌላና ኮዬቴስ።

12 ኢሰቲ ካሴ ጫቂዳ ቃላ ሚዛ ጊሻሰ ሄ ዮኦዛን ባ ቦላ ፒርዳ ኤሄቴስ።

13 ሄሳፌካ ኦሶ ኦላናፔ ዩዩ ዩዩ እሳ ኬሌ ጌላና ዶሴቴስ፤ ኦሶ ኢጾ ጸላ ጊዶንታ ሃሳያናሰ ቤሶንታይሳ ሃሳይሼ ዘጊርዛይታኔ ኮሾንታ አሳ ዮኦ ጊዶ ጮ ዋጺ ጌሊዛይታ ጊዴቴስ።

14 ሄሳ ጊሻሰ እዚናቲ ሃይቂዳ ናቴላ ማጫሳቲ አዴ ጌላና ማላ፥ ናይታ ዬላና ማላኔ ባሶ እሰ አይሳና ማላ፥ ሞርኬይካ ኢሰታ ቦላ ዋሊዛ ሚሼ ዴሞንታ ማላ ታ ዘራይስ።

15 አዳካ ሃይሳፌ ካሴ ኢሲ ኢሲ አሳቲ ጸላኤ ካላና ጉዬ ሹርኢ ጊዳ።

16 እማኒዛ ማጫሲ እኒካ ባሶ እሳ ጊዶን እምኤቲ ዲዛ ጊዲኮ ዋሳ ኬሌ ቱሙ እምኤታ ጸላ ማዳና ማላ ኢዛካ ባ ባጋራ ባ እምኤታ ማዴ ኦቲን ዋሳ ኬላስ ቶሆ ጊዳና ማላ አጉፋ።

17 ዋሳ ኬላ ሎኤሊ አይሲዛይቲ ሃራፔካ ሳባኮኒኔ ታማርሶን ሚኒዛ ጨማቲ ጊዲኮ ዳኮ ማዶ ማዴታናሰ ቤሴስ።

18 ማጸፋን፥ «ካሐ ቡኪዛ ቦራ ዶና ቃቾፋ።» ቃሴካ፥ «ኦሶ ኦሊዛዴይ ዳሞዛ ኤካና ቤሴስ» ጌስ።

19 ናምኤ ማርካይ ዋይኮ ሄቹ ማርካይ ማርካቶንታ ዲሺን ጨማ ቦላ ሺቂዛ ሞቶ ኤኮፋ።

20 ሃራቲ በኢዲ ናጌታና ማላ ናጋራ ኦሊዛይታ አሳ ኡባ ሲንላን ሃንቃ።

21 ጸሳኒኔ ዬሱስ ኪርሰቶሳን ዶሬቲዳ ኪታንቻታ ሲንላን ሃይታ አዛዞታ ኦናካ ማዶንታ ኔ ናጋና ማላኔ ኢሲ ሚሺካ ታ ጎሪፔ ዘቂ ቶቄ ሂሰቶንታ ማላ ታ ኔና ሃዳራ ጋይሰ።

22 ጸሳ ኦሶስ ዶራናስ፥ ኦና ቦላካ ኔ ኩሼ ዋላ ዋሳናስ ኤሶቶፓ፤ ቃሴ ሃራታራ ናጋራ ኦላናስ ዙፔቶፓ፤ ናጋራፔ ኔና ጸሎቴላን ናጋ።

23 ኔና ቃንላን ሳኪዛይሳሲኔ ኡባ ዋዴ ሳኪዛ ሳኮዛ ጊሻስ ዋይኔ ጫጃፌ ጉል ጉጃዳ ኡያ አቲን ሃይሳፌ ጉዬ ሃሌ ጸላ ኡዮፓ።

24 ኢሲ ኢሲ አሳ ናጋራይ ፒርዳይ ያናፔ ካሴቲዲ ቆንጩሰ፤ ባጋይታ ናጋራይ ጊዲኮ ፒርዳፌ ጉዬ ቆንጩሰ።

25 ሎኦ ኦሶይካ ሄሳ ማላ ቆንጩ፤ ቆንጩንታይ ዲኮካ ቆቴቲ አቴና።

6

1 ጸሳ ሱንሊኔ ኢዛ ቲሚርቲይ ጫዬቶንታ ማላ አይሌቴላ ቃምባራ ጊዶን ዲዛይቲ ወሪ ባ ጎዳስ ኩሜላ ቦንቾይ በሲዛይሳ ኤሬቶ።

2 አማኒዛ ጎዳቲ ዲዛ አማኒዛ አሽካራቲ ጎዳቲ ኢስታስ ኢሻታ ጊዲዳ ጊሻስ ጎዳታስ በሲዛ ቦንቾ አሜቶ፤ ሃራፔካ ኢስታ ኦሶን ማዴቲዛ አማኒዛ ጎዳቲ ኢስታስ ዶሴቲዳይታ ጊዲዳ ጊሻስ ኔካ ሃይታንታ ማላ ዮኦታ ታማርሳናሲኔ ዘራናስ በሴሰ።

ዋርዶ ቲሚርቲኔ ቱሙ ዱሬቴል

3 ኦኒካ ዋርዶ ቲሚርቲ ታማርሲኮ ጎዳ ዬሱስ ኪርሰቶሳ ሎኦ ቃላኔ አያና ቱማቴላ ሚንሊዛ ቲሚርቲራ ጋጎንታይሳ ጊዲኮ።

4 ሄሳዴይ ኦቶሬቴላን ኩሚዴሲኔ አይኮካ ዩሺ ቆፔና፤ ኢሲ ኢሲ ቃላታ ጊሻስ ፓላሚታናሲኔ ኦዬታናስ ኢታ አሞይ ኢዛን ዴሰ፤ ሄይቲካ ቃናቴቴል፥ ኦሽ፥ ጫሽ፥ ኢታ ሲጴ ካሌሌቴሰ።

5 ቱማይ ኢስታፌ ኤኬቲ ጊዲን አያና ኦሶን ዋዴ ዴማና ሚሳቲዛ አሳታኔ ቆፋ ፓጩ አሳታ ጊዶን ጎሼቲዲ ዱጾንታ ኦሽ ኤሄቴሰ።

6 ጊዶ አቲን ቱሙ አያና አስ ጊዴሊ ኦስ ዲዛይሳን ዋፑ ጊዲ ዱሳራ ጊታ ዋዴ።

7 ጋሶይካ ኦ ሃይሳ ሃ አላሜዛ ዪሼ አይኮካ ኤኪ ዪቤኮ፤ ቢሼካ ቃሴ አይኮካ ኤኪ ቦኮ።

8 ጊዶ አቲን ኦስ ማናይሰኔ ኦ ማይአናይሲ ዲኮ ጊዳና።

9 ዱሬ ጊዳናስ ኮይዛይቲ ጊዲኮ ጌዳ ፓጩኒኔ ናርጸን ጌሊዲ ካይኬቲዛይሳ ማላ ዳሮ ሃዳኒኔ ኢታ ኣሞን ኣንኤቲቲስ።

10 ጋሶይካ ሚሻ ሲቆይ ኢታቴል ኡባስ ጸጸ፤ ኢሲ ኢሲ ኣሳቲ ዱሬ ጊዳና ጊዲ ኣሞቲዳ ኣሞፔ ዳንዲዳይሳን ኣማኖ ኦጌፔ ባሌቲዲ ሃራሶ ቢዳኔ ባርካ ባና ዳሮ ሜቶ ጊዶ ጌልሊዳ።

ጳውሎሲ ጸምቶሳስ ኣሚዳ ሃዳራ ቃላ

11 ኔኖ ጸሳ ኣሶ! ኔ ሄሳ ኡባፌ ባቃታ፤ ዲሎቴል፣ ቱሙ ኣያናን ዱስ፣ ኣማኖ፣ ሲቆ፣ ዳንዳያኔ ኣሽኬቴል ካላ።

12 ኣማኖ ባጼ ሎኤላ ባጼታ፤ ዳሮ ማርካታ ሲንላን ሎኦ ኣማኔቴላን ኔ ማርካቲዳይሳኔ ኔ ኢዛስ ጴይጌቲዳ ሜርና ዳኦዛ ሎኤላ ኣይካ።

13 ኡባሲካ ዴኦ ኣሚዛ ጸሳ ኣቻን ሄሳላካ ጸንጸሳ ጲላጸሳ ሲንላን ቱማ ማርካቲዳ ዬሱስ ኪርሰቶሳ ሲንላን ታ ኔና ሃዳራ ጊዛይ።

14 ጎዳ ዬሱስ ኪርሰቶሲ ቆንጫና ጋካናስ ኔስ ኣሜቲዳ ኦሶዛ ዎሶይ ባይንዳ ኔ ፖላና ማላ ቤሴስ።

15 ሄ ቆንጩሊ ኣንጃቲዳይሲ ባርካ ኡባ ሃሪዛይሲኔ ካዎታ ካዎይ፣ ጎዳታስ ጎዳይ ኢዚ ባ ዎዴን ቤሳና።

16 ኢዚ ጸላ ሃይቆንታይሳ፤ ኦኒካ ሺቃናስ ዳንዳዮንታ ፖኦ ጊዶን ዴስ፤ ኢዛ ቤኢዳ ኣሲ ኦኒካ ባ፤ ቤያና ዳንዳይዛዴይካ ዴና፤ ኢዛስ ዎልቃይኔ ቦንቾይ ሜርናፔ ሜርናስ ጊዶ። ኣሚን።

17 ሃይሳ ሃ ኣላሜዛን ዱሬቲዳይቲ ኦቶሬቶንታ ማላ ኣዛዛ፤ ኦ ኡፋዬታና ማላ ወርሲካ ዳርሲ ቲርፊሲዲ ኦስ ኣሚዛ ጸሳን ኣቲን ኣማንሶንታ ሚሻን ኣማኔቶንታ ማላ ኣሳስ ዮታ።

18 ሎኦ ኦላና ማላኔ ሎኦ ኦሶን ዱሬታ ጊዳና ማላ፣ ኪያታኔ ሻኪ ኣማናስ ዳሲዛይታ ጊዳና ማላ ኣሳ ኣዛዛ።

19 ሄሳላካ ቱሙ ጊዲዳ ዴኦ ዴማና ማላ ቡሮፔ ያና ዎዴስ ኣሳይ ሚኖ ጸጸ ጊዲዛ ሃሮ ባስ ሺሻና።

20 ጸምቶሳ! ኔ ሃዳራ ኤኪዳይሳ ወርሳ ናጋ፤ ጸሳ ቦንቹሶንታ ሃዳ ዶና ሎሞኡሎሞኣፌኔ ዎርዶ ኤራቴል ጌቴቲዛ ኣሲ ባፔ ሜጲ ኬሲዳ ቲሚርቲፌ ሃካ።

21 ኦስ ሄሳ ማላ ኤራቴል ዴስ ጊዛ ኢሲ ኢሲ ኣሳቲ ሄሳላ ኦሶን ኣማኖ ኦጌፔ ባሌቲዳ፤ ጸሳ ኪያቴል ኢንቴናራ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b